

荻芬書屋文彙

下

荻芬書屋文稿

劉震卿東園感舊圖跋

讀問杉先生序知圖中人

梅蘊生朱鞠垞并震卿而三

惟吾震卿獨存讀讓之

先生詩知作序人

錢問杉嗣遠

首唱人

侯青甫雲松

又先後遇難亡矣每讀

一過宜吾震卿淒然欲絕也恂重有感焉曩官京師與吳蓮芬助

教徐來峯宮允鍾小亭閣讀朝夕過從不止如圖中之一聚而已

今小亭帥鄉兵殉節瓜洲來峯以窮愁卒玉田而助教仲兄甄甫

制帥亦死黃州之役展讀此圖洩瀾曷已嗚呼茫茫大地尙復問

誰酒杯誰壘塊哉質之震卿或不見詫耳

劉小英通守立雪圖跋

小英通守以立雪圖見示且爲恂言令叔仲寅先生受知於程春海侍郎嘗築學海樓以祀之通守今受知於容伯光祿爰繪此圖以志不忘恂維古人報本返始之義雖簞食豆羹必祝之通守亦猶行古之道也可不謂厚歟抑光祿言論風采恂曩官京師服膺久矣今通守佩師訓不忘將必朝夕砥礪發抒其經濟以副光祿之望則所以報光祿者固自有在而非區區一圖已也

手摹清河道轄保正二府易冀趙深定五直隸州所屬五十

三州縣水道圖跋

咸豐六年三月中旬臣恂服闋抵都經孔修相國大少司農於四月十有二日奏請留部綜司派辦事件得旨俞允蓋

國家二百餘年以來所未有者涓埃未效兢惕方深越八日復蒙恩簡授清河道篆務拜

命之下夙夜祇懼顧名而思求所以稱厥職乃購畿輔通志直隸河渠志畿輔安瀾志潞水客談水利輯覽水道管見水利私議澤農要錄水利營田圖說怡賢親王疏鈔陳學士文鈔諸書籌鑑檢閱梢梢悉諸水源委仲夏月望下車保陽二十有二日接篆視事

索署中舊牒得所屬府州縣水道圖一目了然計五十三頁手摹一過仍裱演爲三冊時置案頭每閱公牘輒考證流覽或無戾乎分巡之義是則私衷所竊企者爾

大清河源流圖跋

臣恂以去歲丙辰夏四月蒙

恩簡授清河道篆務拜

命浹月下車視事亟索舊牘得所屬州縣水道圖計五十三頁手摹一過時置案頭省視顧官以清河爲名稱而是圖州縣中之有清河者綴屬之祇居清河之半蓋自霸州屬苑家口永濟橋以東

河爲天津道轄清河道所屬州縣水道圖最東至雄縣之茅兒灣止東距永濟橋尙一舍而遙安雄中間犬牙相錯又復缺任邱境河身一截弗能覩其全也先是制府譚竹崖先生曾居是官銳意以水利爲務至是總制畿輔奏請興修要工部議得

旨報可檄恂司水利局事恂不敏深以不克祇承是懼竊維治水弗竟其委則尾閭不暢胸腹皆病紫陽朱子謂治水施工必先下游實片言居要爰於疏瀹馬道河傳官營河之次親棹小舟發篋陳書探討舊聞證以所見手自屬橐繪爲此圖上接茅兒灣厯保定縣屬張青口抵霸州苑家口永濟橋並補南面任邱諸橋梁淀

泊以竟清河道屬大清河全河之境其自永濟橋而東若文安若
大城若靜海若天津諸邑清河之屬天津道者併列入之迄於海
河清河源流於是乎略備蟋蟀之次章曰職思其外夫既思之矣
忍復外之乎蓋猶是職思其居職思其憂之義正不敢以越俎爲
嫌也歸乃上之制府而畱其副帙時咸豐七年歲次丁巳夏六月
既望

應 教書誼道書室額跋

宣宗成皇帝嘗

御書正誼書屋

賜恭親王

文宗顯皇帝復

賜王以

御書明道齋橫幅

兩朝厚澤思所以啓迪後人世篤忠貞爰於清甫貝勒講學之地

顏之曰誼道書室蓋恭繹先後欽奉

聖訓兼綜而條貫之俾世世子孫同此服膺而勿失也懿鑠乎

國恩家慶用保無疆已

爲熙挹雲侍郎書春風秋月額跋

挹雲少農頃總馬蘭鎮兵兩閱月輿論翕然比其去也顏其公廨之堂曰春風秋月以廕去思恂惟和如春風和之極清如秋月清之極不惠不夷亦惠亦夷微斯人吾誰與歸爰復隸此顏其私居之堂

爲林綬卿觀察書勤謹和綬額跋

雲南司堂舊有此額並附繹綬字之義於後恂與綬卿觀察共事此堂久矣今觀察之任粵東瀕行囑書此語蓋不忘二十年來得力之所自抑又聞之警敏之與急遽也從容之與泄沓也固當辨之於微而不容以相假也綬也而勤以先之所謂合之則雙美者

矣佩韋佩弦義固各有當也願仍與觀察共勉之

爲文博川宮保書不負初心額跋

博川仁兄宮太保恂與同事三年矣其涖事慤慤警摯自朝至於日中昃三年如一日恂心折焉夫人自束髮受書莫不以古大臣忠藎自命迄乎宦成名立往往稍陵夷者有之蓋初心之未易言不負也獨吾博翁則否三年云者第就今同事目擊時言言三年而三年以前可知抑此三年以後之日相砥礪於無窮更必有與年俱進者固可拭目俟之也時同治甲子仲秋

爲毛煦初侍郎書鐵如意館額跋

乙丑秋仲煦初少宰囑爲隸此并言如意爲明趙忠毅南星舊物
歲壬戌得之汝南款識尙可辨數載軍中每以自隨今以名齋云
云觀少宰言可以知少宰矣走筆應命卽希正腕

爲譚竹崖侍郎書竹餘小隱額跋

竹崖司農顏其室曰竹餘小隱而以書屬恂恂惟勁節唯竹虛心
亦唯竹竹翁之隱於竹也固宜宜則曷言餘毋亦惟是輭紅塵裏
而能使我竹翁筆牀茶竈得以繚碧縈青翛然意遠者皆此君之
餘也汔可小休汔可小憩賦詩斷章可也

爲恆子久侍郎書爲國額跋

歲庚申都城之役子久司空獨出與英法人議於華嚴寺久不決
司空奮然曰今日我死乃可濟也拂袖竟入英法人相顧愕眙謂
中國有人如是乎破扉急救請如議越二載爲同治初元壬戌八
月

召對養心殿論舊事

聖諭殷殷詢悉當時欲以身殉狀慨然曰爲國乃至此司空頓首
謝旣退益感奮思終身勉副此二字囑恂隸一額以代書紳恂感
其意爰拜手稽首而秉筆焉

爲陳抱潛太守書十二種蘭亭精舍額跋

抱潛太守世兄以書來言先太僕公藏精拓蘭亭十二種爲巨冊
二而失其一越若干年而先巡撫公復得之歷道光甲辰之火咸
豐庚申辛酉之兵均無恙擬於句山舊址築精舍弄之先屬書齋
額以堅斯約恂旣感斯冊遇合之奇而益壯我抱潛太守之志也
隸此以應卽希正腕

爲楊壽鴻郎中書惜齋額跋

惜齋主人以惜名齋而不著所惜大要惜陰之意居多陶士行論
惜陰較量分寸意在假聖惕凡愚以爲陰不及分亦自當惜政以
不著所惜爲優

奉教爲清甫貝勒書世澤堂額跋

同治癸酉夏恭親王欽受

冊封世襲罔替是歲冬清甫貝勒復奉

恩旨加郡王銜

聖澤翔洽賞延於世篳乎尙已明年春恂奉教作隸顏其堂以

紀

恩并爲貝勒規謹按魯禽齊伋世篤忠庠厥有成軌承前啟後

永保無疆繫貝勒是賴惟貝勒勉旃

爲崇地山宮保書世守書香額跋

宮保漱芳藝苑家學淵源尙已博望星槎增重海外邦家之光經籍之光也恪以承先復勤以啟後猗與管城春色卽墨侯封其河山帶礪之矣光緒初元嘉平月

爲齊漸達五壻書聊自排遣額跋

光緒丁丑天貺節後漸達賢聳持此索隸甌香新故奉倩神傷恂書此本以相慰勉然握管時早不自知其腸寸結矣兒女成行前程遠大尙其勛之恂時年七十有一

譚友夏刻水經注批點跋

水經注一書經與注混淆久矣此本淩雜處不可悉數其甚者沔

水篇中下兩卷倒置

趙城夫本以下卷歸併上卷而以中卷爲下卷戴東原通上中下爲一卷而序次如趙良

得

江水篇江水左得湖口以下五行全列爲經渙水篇末句東南

入于潁與潯水篇潯水出鄭縣西北平地一直貫下竟不另行皆

非全書體例實爲踳駁之尤然鍾伯敬朱無易暨友夏三家眉批

雋語絡繹各有會心其行閒圈點則采菁摭華標新領異未嘗非

讀是書者之一助往者黃梨洲作今水經嘗力攻郭酈而甚不滿

於伯敬之水經注鈔譏其割裂以爲詞章之用愚謂不龜手藥雖

以用之克敵爲能見其大要亦何必懸諸禁令遂不許泚泚統者

一用之也分析經注以戴東原氏本爲允今讀此本凡戴本與此

本同列爲經者以朱密圈識之此本列於注而戴本擢爲經者亦
以朱密圈識之此本列爲經而戴本定爲注者以藍密圈識之其
有經字與戴本異及戴逸此羨者亦以藍圈識之得此標識經注
釐然文家質家取材兩便然則水經注何負於人此本之刻又何
負於水經注哉光緒壬午六月八日跋於還讀我書之室時年七
十有六

趙東潛水經注釋跋

右水經注釋四十卷趙東潛一清撰四庫全書已著錄全謝山序
稱其拾遺糾謬旁推交通爲安定君功臣畢秋帆序稱其抉擇詳